

現代生活藝術系列

華嚴經疏論纂要

50

——十迴向品之四

華藏淨宗學會印贈

大方廣佛華嚴經疏論纂要卷第五十

五臺山清涼國師澄觀疏鈔

太原方山長者李通玄論

閩鼓山私淑比丘道霈纂要

十迴向品第二十五

之四

○第六隨順堅固一切善根迴向。長行中亦二謂位行。位果。行中亦三。謂牒釋結。今初牒名徵起佛子。云何爲菩薩摩訶薩隨順堅固一切善根迴向。疏謂所修事善。皆悉順入堅固法性故。下文云。則爲隨順真實住。本分名入一切平等善根。入卽隨

順平等卽堅固。平等之理不可壞。故若順等理。則順諸善根。故下文云。則爲隨順佛住等。又本業云。習行相善無漏善而不一。故名隨順平等一切善根。此則不唯事順於理。理事相順。受平等名。如此平等。方名堅固。此約所迴善根。及所向實際。以立斯名。亦可名爲堅固之善根。堅固卽善根。若以隨順望堅固善根。亦通二義。卽以無礙善根而爲其性。

論第六隨順堅固一切善根迴向。此明般若波羅密爲體。以善財知識名鞞瑟胝羅。住善度城。常供

養耨檀座佛塔以爲表法。鞞瑟胝羅。此云包攝。以
身合佛刹爲名。住善度國者。約化行爲名。故以此
主智慧。善度衆生故。供養耨檀座佛塔者。明戒定
慧解脫。解脫法身爲座體。得佛不涅槃際者。明戒
定慧體無滅沒也。廣如經說。其座不安形象者。明
無相理會。是佛義故。見座入法故。城名善度。身與
空合。名爲佛國。亦名包攝也。以明無相智慧。是佛
不滅度法門。以智無生滅故。

○第二依徵廣釋中。二。先明行所依身。二。具足下
依身起行。前中復二。先明得位。

佛子。此菩薩摩訶薩。或爲帝王。臨御大國。

〔疏〕今初菩薩行檀之身。隨宜萬類。故置或言。而偏語王者。一則在家是施位故。二難捨能捨。舉勝策劣故。三者菩薩多爲王故。以菩薩位。唯有二種。一者法王。二者人王。法王教化人王攝化。具菩薩戒處處爲王故。發號施令。無敢違故。具能施物。遂所求故。帝者。主也。王者。王也。臨者。治也。御亦主領。千乘之國。卽稱爲大。下言爲轉輪王。則以一洲已去。可稱爲大。〔鈔〕千乘之國者。古以一城。出革車。一乘千乘之國。其地千城也。乘卽車乘。謂以皮裹車。革卽皮也。生曰革。熟曰韋。每乘管卒七十人。一洲已去者。輪王有四。鐵輪卽王一洲故。

○二顯具德

威德廣被。名震天下。凡諸怨敵。靡不歸順。發號施令。悉依正法。執持一蓋。溥蔭萬方。周行率土。所向無礙。以離垢繒。而繫其頂。於法自在。見者咸伏。不刑不罰。感德從化。以四攝法。攝諸衆生。爲轉輪王。一切周給。菩薩摩訶薩。安住如是自在功德。有大眷屬。不可沮壞。離衆過失。見者無厭。福德莊嚴。相好圓滿。形體支分。均調具足。獲那羅延堅固之身。大力成就。無能屈伏。得清淨業。離諸業障。

〔疏〕具德中二。先統領自在德。有十二句。初二句總。

有威則下必畏之。有德則下必懷之。故令名振。次
凡諸下十句別。初句釋威。祖父之讐曰寃。四夷有
土曰敵。由威被故敵歸寃順。次發號下。釋上有德。
依正施令。物可則也。執持一蓋等。兼釋臨御。一蓋
有三。一則無私萬物故。二等教十善故。下施蓋中
云爲令衆生得自在蓋。能持一切諸善法故。三慈
悲蓋。大光王云。如諸菩薩爲高蓋。慈心普蔭諸衆
生故。以離垢縉。釋爲帝義。於法自在。釋爲王義。不
刑已下。雙顯威德。謂不以刑戮懲罰之威。但令感
德從化。則威而不猛也。又加苦曰刑。削奪爲罰。導

之以德義。莫敢不服。則庶人無刑。齊之以禮樂。莫故不敬。則大夫無罰。次以四攝下。顯是菩薩揀異世王。爲轉輪王。結成有位。一切周給。有大財。卽財位果。鈔二等教者。夫輪王十善化世故。二菩薩安住下。正報殊倫德。初句結前。義兼生後。有大眷屬下。具七種果也。一宗族果。二離衆過失。不亢不驕。發言誠實。見者無厭。有慈有慧。人所信順。卽信言果。三福德已下。顯大色果。四獲那羅延堅固之身。顯壽命果。五大力成就等。顯大力果。六得清淨業。謂得大念慧。成就總持。曾事不忘。未萌先覺。由斯有土。名振天下。

卽聲譽果。七離諸業障。顯人性果。有業報障。非丈夫故。兼上財位。具八異熟。是增上生。如是自在。是大勢生。具八異熟者。卽瑜伽論三十六。淨行品已辨。

○第二依身起行中三。一明隨相迴向。二明離相迴向。三釋迴向名。初卽迴向菩提。及向衆生。次卽迴向實際。後段通二。又初是廣大迴向。次甚深迴向。後兼深廣。今隨相中分三。初總相標列善根迴向。二佛子菩薩摩訶薩隨所施下。依標廣顯善根迴向。三佛子菩薩摩訶薩隨諸衆生下。總結多門善根迴向。今初亦三。一列所施物。

二其中下。辨所施田。三佛子下。顯行所依心。今
初

具足修行一切布施。或施飲食。及諸上味。或施車乘。
或施衣服。或施華鬘。雜香塗香。牀座房舍。及所住處。
上妙燈燭。病緣湯藥。寶器寶車。調良象馬。悉皆嚴飾。
歡喜布施。或有來乞王所處座。若蓋。若傘。幢。幡。寶物。
諸莊嚴具。頂上寶冠。髻中明珠。乃至王位。皆無所吝。
若見衆生在牢獄中。捨諸財寶。妻子眷屬。乃至以身。
救彼令脫。若見獄囚將欲被戮。卽捨其身。以代彼命。
或見來乞連膚頂髮。歡喜施與。亦無所吝。眼。耳。鼻。舌。

及以牙齒。頭頂。手足。血肉。骨髓。心。腎。肝。肺。大腸。小腸。厚皮。薄皮。手足諸指。連肉爪甲。以歡喜心。盡皆施與。或爲求請。未曾有法。投身而下。深大火坑。或爲護持。如來正法。以身忍受一切苦毒。或爲求法。乃至一字。悉能徧捨。四海之內。一切所有。恒以正法化導羣生。令修善行。捨離諸惡。若見衆生。損敗他形。慈心救之。令捨罪業。若見如來。成最正覺。稱揚讚歎。普使聞知。或施於地。造立僧坊。房舍殿堂。以爲住處。及施僮僕。供承作役。或以自身。施來乞者。或施於佛。爲求法故。歡喜踊躍。爲衆生故。承事供養。或捨王位。城邑。聚落。

宮殿園林。妻子眷屬。隨所乞求。悉滿其願。或捨一切資生之物。普設無遮大施之會。

〔疏〕初句總。或施下別。別中若望下迴。向應爲六十。若直就支數。都八十事。初從飲食至牀座爲一十。以牀座但通是一牀。下文別施座故。次房舍至葢爲二十。傘至頂髮爲三十。以王位爲重。爲明外財施竟。故結云。乃至王位。下文自有王位。後迴向中。此次後無故。次眼至足爲四十。血至腸爲五十。厚皮至救損他形爲六十。示佛興至邑爲七十。從聚落至終爲八十。救獄囚中。雖有妻等四事。但爲一

救囚之行耳。於中前二十七事。是外財施。次救獄囚。一兼於內外。代囚命。下二十九事。唯明內財。下諸門中。或兼內外。或但是外。可以意得。又前二十七施無樂者。是爲慈行。救囚代命等。爲大悲行。餘或通二行。若通相辨。皆兼二行。又代命。救殘害男形。是無畏施。斷殺有二。若望所殺。是無畏施。若望能殺。令持五戒。是爲法施。告示佛興。卽是法施。財施可知。又此等旣並是法門。俱通三施。

○二所施田

其中衆生種種福田。或從遠來。或從近來。或賢或愚。

或好或醜。若男若女。人與非人心。行不同。所求各異。等皆施與。悉令滿足。

〔疏〕施田中等皆施與者。不揀賢愚等故。悉令滿足者。隨所求故。

○三顯能施迴向之心

佛子。菩薩摩訶薩。如是施時。發善攝心。悉以迴向。所謂善攝色。隨順堅固。一切善根。善攝受。想行識。隨順堅固。一切善根。善攝王位。隨順堅固。一切善根。善攝眷屬。隨順堅固。一切善根。善攝資具。隨順堅固。一切善根。善攝惠施。隨順堅固。一切善根。

〔疏〕能施迴向之心者望前是能施之心故云如是施時發善攝心。望後是能迴向心。故云發善攝心。悉以迴向。故下諸門迴向之內皆以此心貫之文中二。先總明後所謂下。別顯於中所攝有五總收上來能施所施。及以施物。言善攝者。釋隨順義。謂此菩薩若行於施。迴向之時。於自他五蘊等。心無住著。不令馳散。故云善攝。如此則與實際相應。便能隨順堅固善根。謂捨住著故。隨順施善。無異求。故隨順戒善。忍深理故。隨順忍善。離色相故。隨順進善。不馳散故。隨順定善。了無生故。隨順慧善。如

是乃至一切。由順實際。任運順於一切。稱性之善。

○第二依標廣顯中。麤相望前。畧有五異。一傘。二頂。前有後無。舍宅一種。前無後有。卽有無異也。二前以法導化。卽後禁殺。令住五戒。卽名字異也。三承事供養。前合後開。象馬等事。前開後合。卽開合異也。四後文舌居牙齒之後。眷屬居妻子之前。骨居腸下。飲於食後。卽前後異。五前畧後廣。其文非一也。餘皆大同。然其都門。但有六十。由開合故。謂十二段。一二相合。一象馬。二幢幡。三寶冠明珠。四耳鼻。五牙齒。六手足。七髓肉。

八厚薄皮九手足指十僮僕十一園林十二妻子復有二段各五事合謂一腸腎肝肺四事及大小腸合一迴向二王位邑聚落宮殿合一迴向故下文云國土一切諸物卽斯五事都十四門合二十事雖闕二事而加二事謂宅舍及開承事與供侍別故有六十門昔光統師以後都門東前標中亦唯六十成一百二十門皆有十善成千二百以七施乘之成八千四百一一具十迴向成八萬四千言七施者隨相有六謂心有三種卽三時喜事有三種卽是三輪入理有

一。卽照三輪空。又以七聖財乘之。亦得。如一施
行。有八萬四千。餘一一行。皆亦如是。此上且約
法門。非無有理。若散說者。行相無量。如施資具
及大會等。不可言一。故次標云。無量無邊。後都
結云。阿僧祇物。實則皆是法界大緣起門。普賢
無礙自在之行。故以一切所有。施於一田。一切
皆爾。一微塵處。卽施一切衆生。徧法界皆爾。一
刹那中。頓成此行。盡前後際。亦爾。此一菩薩滿
法界身。備起此行。仍有純雜。若以純門於一施
眼。徧上時處。唯見施眼。十方無邊。初後無際。餘

門如虛空。雜則隨一施眼具足諸門。餘亦如是。純雜無礙。重重無盡。故知六十八十。乃舉其大綱耳。鈔然其都門下。正出八十六十所以開合。有無故。二出其本意。以皆成事事無礙。重重之文中二。初總標施行成迴向行。

佛子。菩薩摩訶薩。隨所施物無量無邊。以彼善根如是迴向。

疏無量之義已如上辨

○第二一一別顯六十門內。一一皆四。二施行。二迴向行。三雙結二行。四迴向所爲。若闕所爲。則但有三。亦可合後二段爲雙結所爲。此科宜記。

下有廣畧。至文當知。若具四段。門前多不科判。
今第一施食。以食爲世命。貴賤同依。故首明之。
所謂以上妙食。施衆生時。其心清淨。於所施物。無貪
無著。無所顧恪。具足行施。願一切衆生得智慧。食心
無障礙了。知食性無所貪著。但樂法喜出離之食。智
慧充滿。以法堅住。攝取善根。法身智身。清淨遊行。哀
愍衆生。爲作福田。現受搏食。是爲菩薩摩訶薩布施
食時善根迴向。

〔疏〕文但有三。先明施行。言其心清淨者。離施過故。
謂不求名利果報。及怖畏等而行施。故不貪著者。

是無貪思。無顧悵者。是無慳思。又施時無貪著。施已無顧悵。隨所施行。與衆生共。兼於事理。各爲具足。此心在初。亦貫下諸段。二願一切下。迴向行。然其所願。正爲衆生。令得成佛。卽向菩提也。下皆準之。然阿含唯識等說。世間食總有四種。一觸。二思。三識。四段。說出世食。有其五種。一禪悅。二願。三念。四解脫。五法喜。今翻四成五。一翻思。食成智慧食。卽是念食。念慧隣故。二無所貪下。翻於觸食。以成法喜。觸以攝受喜等。能爲食事。故但願法喜。其出離食。卽解脫食。總離四故。二智慧充下。翻於識食。

以成禪悅。禪則不動故。以法堅任。引生功德故。攝取善根。能除煩惱故。二。身清淨。竝如識食。能執持故。四。哀愍下。大悲願力。現受段食。今云搏者。尙依古譯。二是爲下。雙結二行。

○第二施飲

佛子。菩薩摩訶薩。若施飲時。以此善根如是迴向。所謂願一切衆生。飲法味水。精勤修習。具菩薩道。斷世渴愛。常求佛智。離欲境界。得法喜樂。從清淨法而生其身。常以三昧調攝其心。入智慧海。興大法雲。霑大法雨。是爲菩薩摩訶薩。布施飲時。善根迴向。

〔疏〕施飲中亦三。初施行。二以此下。廻向行。於中先牒前起後。後所謂願一切下。別顯願相。下皆倣此。然望食雖異。不離五食。望水雖異。多同水用。故所願事。或翻或順。或敵體相似。或流類以明。不全尅定。文中一如飲無間。易得充足。飲法精勤。速具大道。餘竝可知。鈔一。如飲無間。此卽敵體相似。斷世等。卽順也。入海淫雨。卽同水義也。或翻也得法喜樂。下諸門中。體勢亦爾。隨時解釋。三是爲下。雙結。

○第三施味

佛子。菩薩摩訶薩。布施種種清淨上味。所謂辛酸醎淡。及以甘苦。種種諸味。潤澤具足。能令四太安隱調。

和。肌體盈滿。氣力彊壯。其心清淨。常得歡喜。咽咀之時。不欬不逆。諸根明利。內藏充實。毒不能侵。病不能傷。始終無患。永得安樂。以此善根如是迴向。所謂願一切衆生得最上味。甘露充滿。願一切衆生得法智味。了知一切諸味業用。願一切衆生得無量法味。了達法界。安住實際。大法城中。願一切衆生作大法雲。周徧法界。普雨法雨。教化調伏一切衆生。願一切衆生得勝智味。無上法喜。充滿身心。願一切衆生得無貪著。一切上味。不染世間一切諸味。常勤修習一切佛法。願一切衆生得一法味。了諸佛法。悉無差別。願

一切衆生得最勝味。乘一切智終無退轉。願一切衆生得入諸佛無異法味。悉能分別一切諸根。願一切衆生法味增益。常得滿足無礙佛法。是爲菩薩摩訶薩布施味時善根迴向。爲令一切衆生勤修福德。皆悉具足無礙智身故。

〔疏〕文四。加所爲故。初施行可知。二以此下。迴向行中十願。初願晉經得上味相。則是三十二相之一。經說佛大牙後有甘露泉。但食入口。悉爲甘露。約法亦卽涅槃爲甘露不灰之味。餘文並顯。三是爲下。雙結四爲令下。所爲。

○第四施車乘

佛子。菩薩摩訶薩施車乘時。以諸善根如是迴向。所謂願一切衆生皆得具足一切智乘。乘於大乘。不可壞乘。最勝乘。最上乘。速疾乘。大力乘。福德具足乘。出世間乘。出生無量諸菩薩乘。是爲菩薩摩訶薩施車乘時善根迴向。

〔疏〕分三。初施行者。義通馬等。以第十六別施車故。迴向十願皆約代步。初一唯果。餘兼通因。然乘體性通於理智。隨義立名。一體性包含。二不可廢立。三超劣。四無過。五不歷三祇。六十力普運。七兼五。

度萬行。八無漏相應。九發心趣者。卽名菩薩。通鈔義馬者。以梵語通呼車乘云。野余我反。囊若別呼車云。云奢羯吒。若呼車輅云。曷羅他。此云野囊。明是車乘。故通馬等。下第十六。卽單是車。以梵云奢羯吒故。

○第五施衣

佛子。菩薩摩訶薩布施衣時。以諸善根如是迴向。所謂願一切衆生得慙愧衣。以覆其身。捨離邪道露形惡法。顏色潤澤。皮膚細軟。成就諸佛第一之樂。得最清淨一切種智。是爲菩薩摩訶薩布施衣時善根迴向。

〔疏〕施衣中。瑜伽施衣。能感妙色。以衣禦寒。令顏色

潤澤故。又新衣成。斲持獻佛。得無量福。若要期日數未滿而取。成取佛物。

○第六施華

佛子。菩薩摩訶薩。常以種種名華。布施。所謂微妙香華。種種色華。無量奇妙華。善見華。可喜樂華。一切時華。天華。人華。世所珍愛華。甚芬馥悅意華。以如是等無量妙華。供養一切現在諸佛。及佛滅後所有塔廟。或以供養說法之人。或以供養比丘僧寶。一切菩薩。諸善知識。聲聞獨覺。父母宗親。下至自身。及餘一切貧窮孤露。布施之時。以諸善根如是迴向。所謂願一

切衆生皆得諸佛三昧之華。悉能開敷一切諸法。願一切衆生皆得如佛。見者歡喜心無厭足。願一切衆生所見順愜。心無動亂。願一切衆生具行廣大清淨之業。願一切衆生常念善友。心無變異。願一切衆生如阿伽陀藥。能除一切煩惱衆毒。願一切衆生成滿大願。皆悉得爲無上智王。願一切衆生智慧日光。破愚癡暗。願一切衆生菩提淨月。增長滿足。願一切衆生入大寶洲。見善知識。具足成就一切善根。是爲菩薩摩訶薩。布施華時善根迴向。爲令衆生皆得清淨無礙智故。

疏文四。初施行中。先列施物。後供養下。明所施田。下至自身者。身為福田。是法器故。依之進道故。故施自身。勝施外道無量。所謂下。廻向十願前七可知。八亦蓮華等。不遇日光。翳歿無疑。菩薩之行。必資乎智。涅槃第九云。譬如蓮華。為日所照。無不開敷。九月開青蓮。佛智照行。涅槃第二十二云。譬如月光。能令一切優鉢羅華。開敷鮮明。十約寶華。鈔九青蓮者。即梵行品。耆婆為闍王說。因世尊入月愛三昧。放光照王。王問其故。耆婆答云。此是如來入月愛三昧。放光。問云。何等名為月愛三昧。耆婆答言。譬如月光。能令一切優鉢羅華。開敷鮮明。月愛三昧。亦復如是。能令眾生善心開敷。下即廣說。後今但取月開青蓮耳。合以佛智為月。行為蓮。開後

二段可知

○第七施鬘

佛子。菩薩摩訶薩。布施鬘時。以諸善根。如是迴向。所謂願一切衆生。人所樂見。見者欽歎。見者親善。見者愛樂。見者渴仰。見者除憂。見者生喜。見者離惡。見者常得親近於佛。見者清淨。獲一切智。是爲菩薩摩訶薩。布施鬘時。善根迴向。

〔疏〕施鬘者。貫華如環而爲首飾。或以纓身。故未見則樂見。正見則愛樂。〔鈔〕或以纓身者。在身曰纓。在首曰鬘。纓乃鬘類。皆結華成。

因便
故來

○第八施香

佛子。菩薩摩訶薩。布施香時。以諸善根。如是迴向。願一切衆生。具足戒香。得不缺戒。不雜戒。不汙戒。無悔戒。離纏戒。無熱戒。無犯戒。無邊戒。出世戒。菩薩波羅蜜戒。願一切衆生。以是戒故。皆得成就諸佛戒身。是爲菩薩摩訶薩。布施香時。善根迴向。爲令衆生。悉得圓滿無礙戒蘊故。

〔疏〕施香中。準下塗香。十度萬行。皆香。此偏語戒者。翻破戒之穢故。願有十二。初一總標。次十別顯。少同十藏。多同智論。隨宜不同。但按文釋。一具持三

聚。二不雜外道。三無染心。涅槃經中。乃至染環劍聲。亦名汗菩薩戒。四不犯重故。犯重之人。多生悔恨。五設有誤犯。深慚愧故。如其故犯數犯。不生慚愧。深慶著犯。見犯是福。名之爲纏。六七定共相應。故無惑熱。常持如初。八九道共相應。離斷常邊。成出世行。十遠離二乘。圓修十度。方名不犯菩薩律儀。是智所讚戒。末句結因成果。謂五分之一。

○第九施塗香

佛子。菩薩摩訶薩。施塗香時。以諸善根。如是迴向。所謂願一切衆生。施香普熏。悉能惠捨。一切所有。願一

切衆生戒香普熏。得於如來究竟淨戒。願一切衆生
忍香普熏。離於一切險害之心。願一切衆生精進香
普熏。常服大乘精進甲冑。願一切衆生定香普熏。安
住諸佛現前三昧。願一切衆生慧香普熏。一念得成
無上智王。願一切衆生法香普熏。於無上法得無所
畏。願一切衆生德香普熏。成就一切大功德智。願一
切衆生菩提香普熏。得佛十力。到於彼岸。願一切衆
生清淨白法妙香普熏。永滅一切不善之法。是爲菩
薩摩訶薩。施塗香時善根迴向。

〔疏〕十度皆有熏發資長菩提心義。辟除蔽障。俱得

稱香

○第十施牀座

佛子。菩薩摩訶薩施牀座時。以諸善根如是迴向。所謂願一切衆生得諸天牀座。證大智慧。願一切衆生得賢聖牀座。捨凡夫意住菩提心。願一切衆生得安樂牀座。永離一切生死苦惱。願一切衆生得究竟牀座。得見諸佛自在神通。願一切衆生得平等牀座。恒普熏修一切善法。願一切衆生得最勝牀座。具清淨業世無與等。願一切衆生得安隱牀座。證真實法具足究竟。願一切衆生得清淨牀座。修習如來淨智境。

界。願一切衆生得安住牀座。得善知識常隨覆護。願一切衆生得師子牀座。常如如來右脇而卧。是爲菩薩摩訶薩施牀座時善根迴向。爲令衆生修習正念善護諸根故。

〔疏〕施牀座中。初舉施行。下第十八別明施座。故晉譯此以爲牀敷。深允當也。迴向行中十願。一卽第一義天。大智證故。二菩提心。是賢聖依。三涅槃解脫。四首楞嚴定。名爲究竟。如四禪座。能發神通。餘六可知。

○十一施房舍

佛子。菩薩摩訶薩施房舍時。以諸善根如是迴向。所謂願一切衆生皆得安住清淨佛刹。精勤修習一切功德。安住甚深三昧境界。捨離一切住處執著。了諸住處皆無所有。離諸世間住一切智。攝取一切諸佛所住。住究竟道安樂住處。恒住第一清淨善根。終不捨離佛無上住處。是爲菩薩摩訶薩施房舍時善根迴向。爲欲利益一切衆生。隨其所應。思惟救護故。

疏施房舍中。攝取一切諸佛所住。謂聖天梵等。後言不捨佛最上住者。住大寂室。餘取事類例。可以虛求。

○十二施住處

佛子。菩薩摩訶薩施住處時。以諸善根如是迴向。所謂願一切衆生常獲善利。其心安樂。願一切衆生依如來住。依大智住。依善知識住。依尊勝住。依善行住。依大慈住。依大悲住。依六波羅蜜住。依大菩提心住。依一切菩薩道住。是爲菩薩摩訶薩施住處時善根迴向。爲令一切福德清淨故。究竟清淨故。智清淨故。道清淨故。法清淨故。戒清淨故。志樂清淨故。信解清淨故。願清淨故。一切神通功德清淨故。

〔疏〕住處。謂僧坊等。

○十三施燈

佛子。菩薩摩訶薩施諸燈明。所謂酥燈。油燈。寶燈。摩
尼燈。漆燈。火燈。沉水燈。梅檀燈。一切香燈。無量色光
燈。施如是等無量燈時。爲欲利益一切衆生。爲欲攝
受一切衆生。以此善根如是迴向。所謂願一切衆生
得無量光。普照一切諸佛正法。願一切衆生得清淨
光。照見世間極微細色。願一切衆生得離翳光。了衆
生界空無所有。願一切衆生得無邊光。身出妙光。普
照一切。願一切衆生得普照光。於諸佛法心無退轉。
願一切衆生得佛淨光。一切剎中悉皆顯現。願一切

衆生得無礙光。一光徧照一切法界。願一切衆生得無斷光。照諸佛刹光明不斷。願一切衆生得智幢光。普照世間。願一切衆生得無量色光。照一切刹。示現神力。菩薩如是施燈明時。爲欲利益一切衆生。安樂一切衆生故。以此善根隨逐衆生。以此善根攝受衆生。以此善根分布衆生。以此善根慈愍衆生。以此善根覆育衆生。以此善根救護衆生。以此善根充滿衆生。以此善根緣念衆生。以此善根等益衆生。以此善根觀察衆生。是爲菩薩摩訶薩施燈明時善根迴向。如是迴向無有障礙。普令衆生住善根中。

疏一明施行。於中列其施物。寶燈者。如夜光之類。沉水栴檀。用和酥油。無量色者。然膏色白。然漆色赤。然油色黃。然檀色綠。如是種種。如是等下。明其施意。二以此下。迴向行。於中先正顯迴向願。後辨迴向意。前中十願。然準瑜伽賢首。皆明施燈得淨眼報。然燈功德經。燒燈供養。大能滅罪生福。令發願言。當以大海爲油。須彌爲炷。然大燈明。徧佛刹海。供養無休。又願法門之燈。大願爲炷等。今文願中。具身智光。竝可思準。後菩薩如是下。顯迴向意。三是爲下。雙結四如是下。迴向所爲。其迴向意。諸

文應具大同所爲。故畧不明。

○十四施湯藥

佛子。菩薩摩訶薩施湯藥時。以諸善根如是迴向。所謂願一切衆生於諸蓋纏究竟得出。願一切衆生永離病身得如來身。願一切衆生作大良藥滅除一切不善之病。願一切衆生成阿伽陀藥。安住菩薩不退轉地。願一切衆生成如來藥。能拔一切煩惱毒箭。願一切衆生親近賢聖。滅除煩惱修清淨行。願一切衆生作大藥王。永除衆病不令重發。願一切衆生作不壞藥樹。悉能救療一切衆生。願一切衆生得一切智。

光出眾病箭。願一切眾生善解世間方藥之法。所有疾病爲其救療。菩薩摩訶薩施湯藥時。爲令一切眾生永離眾病故。究竟安隱故。究竟清淨故。如佛無病故。拔除一切病箭故。得無盡堅固身故。得金剛圍山所不壞身故。得堅固滿足力故。得圓滿不可奪佛樂故。得一切佛自在堅固身故。以諸善根如是迴向。

〔疏〕湯藥中三。一。施行。施藥近果。得無病報。如薄俱羅。遠得藥王樹身等。如十大願中辨。二。迴向。行。言不重發者。經云。世醫所療治。雖差還復生。如來所治者。畢竟不復發。餘可知。三。菩薩下。雙辨二行所。

爲言金剛圍山所不能壞者。如不思議法品十種
大那羅延幢勇健法中第一說。堅固滿足力。亦是
彼品中十力第七。名堅固力。不可奪樂者。是常樂
故。自在堅固身者。卽金剛身。金剛爲內照之實。非
唯金色。故云自在。鈔卽金剛身者。涅槃第三。有金
剛身品。金剛爲內照之實。卽生
公釋。言非唯金色。亦不全
遮。意通內外耳。前已引竟。

○十五施器

佛子。菩薩摩訶薩。悉能惠施一切器物。所謂黃金器
盛滿雜寶。白銀器盛衆妙寶。瑠璃器盛種種寶。玻瓈
器盛滿無量寶莊嚴具。碑磔器盛赤真珠。瑪瑙器盛

滿珊瑚摩尼珠寶。白玉器盛眾美食。栴檀器盛天衣服。金剛器盛眾妙香。無量無數種種寶器盛無量無數種種眾寶。或施諸佛。信佛福田。不思議故。或施菩薩。知善知識難值遇故。或施聖僧。爲令佛法久住世故。或施聲聞及辟支佛。於諸聖人生淨信故。或施父母。爲尊重故。或施師長。爲恒誘誨。令依聖教修功德故。或施下劣貧窮孤露。大慈大悲。愛眼等視諸眾生故。專意滿足去來今世一切菩薩檀波羅蜜故。以一切物普施一切。終不厭捨諸眾生故。如是施時。於其施物。及以受者。皆無所著。菩薩摩訶薩。以如是等種

種寶器。盛無量寶而布施時。以諸善根如是迴向。所謂願一切衆生成等虛空無邊藏器。念力廣大。悉能受持世出世間一切經書。無有忘失。願一切衆生成清淨器。能悟諸佛甚深正法。願一切衆生成無上寶器。悉能受持三世佛法。願一切衆生成就如來廣大法器。以不壞信。攝受三世佛菩提法。願一切衆生成就最勝寶莊嚴器。住大威德菩提之心。願一切衆生成就功德所依處器。於諸如來無量智慧生淨信解。願一切衆生成趣入一切智器。究竟如來無礙解脫。願一切衆生得盡未來劫菩薩行器。能令衆生普

皆安住一切智力。願一切衆生成就三世諸佛種性。勝功德器。一切諸佛妙音所說悉能受持。願一切衆生成就容納盡法界虚空界一切世界一切如來衆會道場器。爲大丈夫讚說之首。勸請諸佛轉正法輪。是爲菩薩摩訶薩布施器時善根迴向。爲欲普令一切衆生皆得圓滿普賢菩薩行願器故。

〔疏〕施器中文四。初施行中三。一。所施物。二。或施下。對田顯施。聖僧通三乘。三。如是下。成波羅密。二。菩薩下。明迴向。行十願。一。廣。二。深。三。高。四。堅。五。勝。六。淨。七。果。八。悲。九。聞熏納教。十。攝法上首。然隨施一。

器。卽發多願。未必一器以對一願。三是爲下結。四所爲可知。

建安縣龍頭菴比丘興祐捐貨刊刻
華嚴經十迴向品疏論纂要第五十卷
永遠流通上薦
故考江應照妣王氏葵娘永脫娑婆頓
超極樂同遊毘盧性海共入華藏玄門
法界有情圓明種智者
康熙庚申年正月
華藏室謹題

弟子吳師臯
詹其章奉梓

大方廣佛華嚴經疏論纂要卷第五十